

## SYAIR TENGGU BUDRIAH

Zuraidah Mohd Zain  
Harshita Aini Haroon

Almarhum Tengku Budriah binti Almarhum Tengku Ismail menjadi Raja Perempuan Perlis pada tahun 1945 sehinggalah kemangkatan suaminya Almarhum Tuanku Syed Putra Jamalullail pada tahun 2001. Antara 1960 hingga 1965, Tengku Budriah dinobatkan sebagai Raja Permaisuri Agong yang ketiga. Walaupun Almarhum telah turut serta mencorakkan lanskap kehidupan rakyat jelata, khususnya di Perlis, namun, perincian kehidupan Almarhum amat jarang ditemui di dalam khazanah ilmu negara. Sekiranya dihimpun semua tulisan mengenai Almarhum, akan didapati bahawa faktanya berkisar di sekitar beberapa perkara yang serupa. Maka sudah tiba masanya kisah hidup Almarhum dikaji dan didokumenkan dengan sewajarnya agar ia tidak hilang di dalam lipatan sejarah. Selaras dengan semangat memartabatkan pusaka peninggalan masyarakat Melayu silam, kisah hidup Almarhum disemadikan di dalam bentuk syair. Kumpulan syair sejarah empat baris serangkap yang dipersembahkan di sini telah digubah berdasarkan kajian persuratan tentang diri Almarhum daripada sumber Internet dan daripada bahan di Muzium DiRaja Kayang, Perlis. Jelas kelihatan bahawa jumlah fakta yang terdapat adalah amat sedikit, sekali gus menguatkan lagi keperluan untuk melaksanakan kajian mengenai wanita ini di masa hadapan. Pemilihan media syair, yang merupakan kegemaran orang Melayu dalam menyampaikan mesej, serta berperanan sebagai sumber hiburan di zaman lampau, dirasakan amat sesuai dijadikan mukaddimah kepada kajian yang lebih mendalam yang akan dilaksanakan ke atas personaliti istimewa ini.

1.  
Tersebut kisah seorang puteri  
Tengku Budriah nama diberi  
Sungguh indah akhlak pekerti  
Paras jelita tidak terperi

2.  
Di Kuala Krai negeri Kelantan  
Tempat lahir puteri budiman  
Tengku Kadir empunya keturunan  
Raja Pattani Siam Selatan

3.  
Tengku Ismail ayahnda baginda  
Tengku Zubaidah nama sang bonda  
1924 lahir ke dunia  
Tanggal dua lapan bulan ketiga

4.  
Dengan penuh kasih dan sayang  
Puteri dijaga pagi dan petang  
Bagai minyak tertib ditatang  
Besar menjadi manusia matang

5.  
Tujuh tahun meniti usia  
Di sekolah Melayu ilmu ditimba  
Ke sekolah Inggeris disambung pula  
Hingga ke Perak jelajah baginda

6.  
Lemah lembut budi pekerti  
Muda lela lagi bestari  
Merata tempat ilmu dicari  
Otak cergas pemikiran tinggi

7.  
Acara bersukan masa diisi  
Gerakan Brownie dan Pandu Puteri  
Begitu juga badminton hoki  
Pasukan sekolah baginda wakili
8.  
Sembilan belas patpuluh satu  
Tujuh belas di usia waktu  
Jalinan kasih cinta nan syahdu  
Bertemu jodoh di saat itu
9.  
Suami berasal dari utara  
Negeri Perlis kerabat di raja  
Dikenali dengan Tuanku Syed Putra  
Rumah tangga aman bahagia
10.  
Hasil hidup baginda berdua  
Suka duka dilayari bersama  
Dikurnia sepuluh cahaya mata  
Lima puteri lima putera
11.  
Pernah juga di satu ketika  
Semasa Jepun berleluasa  
Di Kota Baru tempat baginda  
Jalani hidup yang amat sederhana
12.  
Tidak lama selepas ini  
Yang Maha Kuasa merubah rezeki  
Negeri Perlis takhta diberi  
Singgahsana indah baginda naiki
13.  
Bulan Mac patpuluh sembilan  
Tuanku Syed Putra rasmi ditabalkan  
Tengku Budriah Raja Perempuan  
Di atas takhta seri menawan
14.  
Segala alat warisan diraja  
Tombak lembing lambang kuasa  
Tepak sirih tengkolok sasa  
Disusun gagah pandangan mata
15.  
Berlangsung dalam Balai Rong Seri  
Istana Arau cantik dihiasi  
Gilang gemilang majlis terjadi  
Terukir sejarah indah abadi
16.  
Nurani luhur Raja Permaisuri  
Kepada Perlis ingin berbakti  
Orang miskin perhatian diberi  
Kanak-kanak permata hati
17.  
Kuda haiwan jadi tunggangan  
Bahasa Perancis jadi ucapan  
Masa berlalu tidak dibiarkan  
Tungkus lumus demi kebajikan
18.  
Memasak juga minat baginda  
Menjahit baju menggubah bunga  
Menanam pokok melakar idea  
Hasil dijual untuk diderma
19.  
Begitu banyak menabur budi  
Pelajar sekolah pakaian diberi  
Anak angkat projek dimulai  
Memberi peluang para pribumi
20.  
Tengku Budriah wira pertiwi  
Amat indah hati nurani  
Pelbagai penyakit rakyat deritai  
Khidmat merawat di Pusat Bakti
21.  
Lagi hasil si buah tangan  
Darulfarah Taman Asuhan  
Lama kelamaan ubah sebutan  
Yayasan Amal nama peninggalan
22.  
Setengah abad di atas takhta  
Di samping baginda suami tercinta  
Permaisuri Agong Negara kita  
Memberi khidmat sedaya upaya

23.  
 Dari Malaya ke Malaysia  
 Di singgahsana menabur jasa  
 Membina adat nusa dan bangsa  
 Agar mantap seantero dunia

24.  
 Kepada suami amat dikasihi  
 Rasa hormat tidak terperi  
 Sanggup berendam lautan api  
 Bersama-sama hidup dikemudi

25.  
 Namun sebagus mana pekerti  
 Apabila saja dipanggil Illahi  
 Kepada Allah jua kembali  
 Akhirat negeri kekal abadi

26.  
 Tuanku Syed Putra menyahut  
 panggilan  
 Ke rahmatullah tempat pemergian  
 Anakanda Sirajuddin pewaris  
 kerajaan  
 Raja Perempuan Besar Budriah  
 dinobatkan

27.  
 Walau suami tiada di sisi  
 Tengku Budriah terus berbakti  
 Pelbagai lembaga menjadi ahli  
 Pertubuhan amal baginda naungi

28.  
 Satu pagi dua ribu lapan  
 Nafas terakhir telah dihembuskan  
 Begitu sebak penuh tangisan  
 Kaum kerabat juga kenalan

29.  
 Maka hilanglah permata negeri  
 Gemala rakyat paduan hati  
 Pergi mengadap Rabbul Illahi  
 Di mana gerangan mencari ganti

30.  
 Jenazah baginda disembahyangkan  
 Lalu disemadi bersebelahan  
 Dengan suami Almarhum sultan  
 Di tanah Perlis Indera Kayangan

31.  
 Dari sepuluh puteri dan putera  
 Tiga puluh lima cucunda  
 Di samping itu terdapat juga  
 Dua puluh empat cicinda

32.  
 Tinggi menggunung jasa baginda  
 Amat dirasakan rakyat jelata  
 Segala budi tidak dilupa  
 Hari ini setiap masa

33.  
 Kepada Allah jua diminta  
 Agar rohnyanya dipelihara  
 Moga nikmat dan sejahtera  
 Bawah jagaan Azza Wajalla